

# Dörfligeischer 2014

Biel / Bienne Bözingenfeld / Champs-de-Boujean,  
Dr längschi Name vore Hautsteu wo d' SBB je hett gha,  
Die Tafele isch so läng, das hesch no niene gseh,  
Die längt vo Pieterlen bis fasch a Bielersee !

\*\*\*\*\*

Ä schwarze Diener dräiht sech ufem Karussell im Kreis,  
Äs paar Gschtörti störe sech ab däm - u mache Riese-Mais,  
Mir finge das doch bireweich u froge üs e chly,  
Ob das würklech die grösschte Problem in Biel tüe sy ?

Wär dä Diener ufem Karussell e Wysse,  
Würds keine intressiere und keine bysse,  
Es chönnt drum e Schwyzer sy, und das wär ganz egal,  
Die cha me apöble u abemache, das isch ganz normal !

\*\*\*\*\*

D' BSG isch stolz uf ihre nöie Kahn,  
Die Rousseau sig technisch dr auernöischti Wahn,  
Doch wenn die Technik nid louft uf so-m-ne moderne Schiff,  
Chasch no so lang am Joy-Stick heble - fahrsch ds Altreu glych uf ds Riff !

\*\*\*\*\*

Im Droge-Milieu ds Biel chlei umehange,  
U wenn di plötzlech packt es grosses Verlange,  
Geisch mit kaputte Droge-Meitschi go penne,  
So lehrsch die Szene in- und uswändig kenne,  
Genau eso muesch es de äbe grad mache,  
Wenn Karriere als Thorbärg-Diräkter wottschi mache !

\*\*\*\*\*

La-la-la-la-la-la-la-la-la-la-la-la-la-la-la,  
Na-na-na-na-na-na-na-na-na-na-na-na-na-na,  
Lo-lo-lo-lo-lo-lo-lo-lo-lo-lo-lo-lo-lo-lo-lo-lo,  
Dä Värs isch so verschlüsslet, dä cha sogar d' NSA nid verstoh !

\*\*\*\*\*

Üsi Stadt die muess jetz spare a allne Egge,  
Viu Vereine müesse blüete, mir chöi das nid tschegge,  
Und alli WC bschliesse - nei - tüet uf üs Geischer lose,  
Löt das gschyder lo sy, das geit süsch vou i d' Hose !

\*\*\*\*\*

Mir sy stolz uf Biel als üsi Uhrestadt,  
Was do technisch louft , das isch doch huere glatt,  
Doch eis, das chöi mir würklech nid verstoh,  
Zmitts ir Stadt isch d' Zyt jetz blybe stoh,  
Hett äch öpper die Batterie usegnoh ?  
Mit dere nöie Technik isch das halt eso,  
Worum die nümme louft, das weiss doch jede Totsch,  
Das isch halt nume e billigi Chinese-Watch !

\*\*\*\*\*

Ä Zürcher louft ar Wiehnacht' ds Biel dür d' Bahnhofstross,  
Und seit: " *Bi öis in Züri, da isch alles häll und gross,*  
*Doch wie das da isch cha-n-ich gopferteckel nüd verstah,*  
*Die Strass bi öich isch dunkel und schwarz wie ds Afrika ! "*